

आकाशवाणी

खबरां

1 अगली सरकार दे गठन पैहले अज्ज प्रधानमंत्री नरेंद्र मोदी होरें केंद्री मंत्रीमंडल सने राष्ट्रपति मुर्मू होरें गी अपना इस्तीफा सौंपी दित्ता।

2. लोकसभा सचिवालय 18मीं लोकसभा दे मिम्बरें दे सौआगत लेई पूरी चाल्ली तैयार।

3 अज्ज विश्व पर्यावरण दिवस मनाया जा रदा ऐ। एहदा मकसद पर्यावरण सरबंधी मुद्दें पर कुल संसारी सैहयोग गी बढ़ावा देना ऐ।

4 दूर संचार विभाग नै चौथे चरण दे उद्योग बदलाव च स्टार्ट अप कन्नै लौहके, भलेयां लौहके ते दरम्याने दर्जे दे उद्यमें दा समर्थन करने आस्तै इक पैहल दी शुरूआत कीती ऐ।

5 दिल्ली दी इक अदालतै कथित शराब नीति घोटाले च दिल्ली दे मुख्मंत्रि अरविंद केजरीवाल होरें गी अंतरिम जमानत देने थवां इंकार करी दित्ता ऐ।

<><><><><><>

PM-Resignation

प्रधानमंत्री नरेंद्र मोदी होरें अज्ज राष्ट्रपति भवन च राष्ट्रपति द्रोपदी मुर्मू हुंदे कन्नै मुलाकात कीती ते उनेंगी अपना ते केंद्रीय मंत्रीमंडल दा इस्तीफा सौंपेया। राष्ट्रपति होरें इस्तीफा मंजूर कीता ते प्रधानमंत्री ते उंदे मंत्रीमंडल गी नमीं सरकार बनने तोड़ी कम्म करदे रौहने लेई आखेआ।

<><><><><><>

Prez. Cabinet Dinner

राष्ट्रपति द्रौपदी मुर्मू होर राष्ट्रपति भवन च निवर्तमान कैबिनेट मंत्रिं आस्तै रातीं खाने दा आयोजन करडन। प्रधानमंत्री नरेंद्र मोदी होरें अज्ज मंत्री परिषद सने राष्ट्रपति मुर्मू होरें गी अपना इस्तीफा सौंपी दित्ता हा।

<><><><><><>

Lok Sabha

राष्ट्रपति द्रौपदी मुर्मू होरें 17मीं लोकसभा भंग करी दित्ती। एहदे थवां पैहले अज्ज केंद्रीय मंत्रीमंडल नै दपैहरी मगरा होई दी बैठक च राष्ट्रपति होरें गी 17मीं लोकसभा फौरी प्रभाव कन्नै भंग करने दी सलाह दित्ती।

<><><><><><>

Lok Sabha-Secretariat

लोकसभा सचिवालय 18मीं लोकसभा दे मिम्बरें दे सौआगत लेई तैयार ऐ। सचिवालय नै आखेआ ऐ जे मिम्बरें दे सौआगत लेई नेकां गैं पुट्टियां जा रदियां ना। समें दी बचत ते पेपरलेस डिजिटल प्रक्रिया लेई नमें चुने गेदे मिम्बरें दा पंजीकरण आनलाइन सरिस्ते राएं होगा। एसबीआई बैंक खाते खोलने लेई खास इंतजाम कीते गए ना। उनेंगी आई.डी कार्ड देने, केंद्री सेहत स्कीम सरबंधी कार्ड ते होर दुइएं चीजें गी उपलब्ध करोआने लेई बंदोबस्त कीते गए ना। सचिवालय नै भरोसा दोआया ऐ जे प्रक्रिया 8 थवां 14 जून संज्ञा तगर जारी रौहगा।

<><><><><><>

China-Modi NDA

चीन नै प्रधानमंत्री नरेंद्र मोदी होरें गी भाजपा दी अगुवाई आली एनडीए दी आम चुनां च जित्त लेई मबारकबाद दित्ती। भारतीय चुनां आयोग नै लोकसभा चुनां दे परिणाम घोषित कीते हे जिदे च भारतीय जनता पार्टी नै 453 चां 240 सीटां जित्तियां ते कांग्रेस नै 99 सीटां जित्तियां। भाजपा दी अगुवाई आली एनडीए नै 272 दा जादुई आंकड़ा पार करी लैता ऐ। चीन दे विदेश मंत्रालय दे प्रवक्ता माओ निंग होरें आखेआ जे उनें प्रधानमंत्री नरेंद्र मोदी होरें गी जित्त दी बधाई दित्ती ऐ।

<><><><><><>

NDA-Meeting

नमीं दिल्ली च प्रधानमंत्री नरेंद्र मोदी हुंदे आवास उप्पर एनडीए दी बैठक लगगी। इस बैठक च नेताएं लगातार त्रीए कार्यकाल लेई नरेंद्र मोदी हुंदी अगुवाई च नमीं सरकार बनाने लेई भविष्य दे कम्मं दा रस्ता तय कीता। इस बैठक च तेलगू देशम पार्टी दे प्रधान एन. चंद्रबाबू नायडू, जनता दल यूनाइटेड दे प्रधान ते बिहार दे मुख्मंत्री नितीश कुमार ते लोक जनशक्ति पार्टी दे दे प्रधान राम विलास पासवान ते एनडीए दी बाकी पार्टियों दे नेता मौजूद हे।

<><><><><><>

JDU-RJD Leaders

बिहार दे मुख्मंत्री नितीश कुमार होंरें एनडीए दी बैठक च हिस्सा लैने आस्तै दिल्ली पुज्जी गे। जेडीयू दे सांसद संजय झा होर बी नितीश कुमार हुंदे कन्नै इस बैठक च शामिल होने लेई दिल्ली पुज्जी गे ना। सांसद संजय झा होंरें आखेआ जे एनडीए गी बिहार च जित्त हासल होई ऐ। लोक जनशक्ति पार्टी दे नेता चिराग पासवान होर बी एनडीए दी बैठक च हिस्सा लैने आस्तै नमीं दिल्ली पुज्जी गए ना। उंदी पार्टी नै बिहार थमां लोकसभा चुनां च 5 सीटां जित्तियां ना।

<><><><><><>

JDU-NDA

जनता दल यूनाइटेड नै आखेआ ऐ जे ओह नरेंद्र मोदी हुंदी अगुवाई आले एनडीए गठबंधन गी पूरा समर्थन देग। पार्टी दे प्रवक्ता के.सी त्यागी होंरें आखेआ जे आई.एन.डी.आई गठबंधन शा बाहर जाने दिआं वजहां अजें बी मजूद न इस करियै उंदे कोल वापस जाने दा कोई सोआल गै पैदा नेई हुंदा। त्यागी होंरें इब्बी आखेआ जे उंदी पार्टी बिहार दे विकास लेई विशेष दर्जे दी मंग करदी ऐ। उनें दोष लाया जे आई.एन.डी.आई. गठबंधन अफवाहीं दा केंद्र बनी गेदा ऐ पर नां गै कांग्रेस ते नां गै आई.एन.डी.आई. गठबंधन कश सरकार बनाने दा बहुमत ऐ। त्यागी होंरें साफ करी दित्ता जे बिहार दे मुख्मंत्री नितीश कुमार एनडीए गी अपना पूरा समर्थन देआ करदे ना।

<><><><><><>

Delhi-BJP

दिल्ली भाजपा दे अध्यक्ष वीरेंद्र सचदेव होंरें अजज दावा कीता ऐ जे होरनें राज्ये दे कारण आई.एन.डी.आई. गठबंधन दिल्ली च सारी सीटें उप्पर हारी गेआ। नमीं दिल्ली च मीडिया आलें कन्नै गल्लबात करदे होई उनें आखेआ जे आम आदमी पार्टी ते कांग्रेस पंजाब च इक दुए खलाफ लड़ा करदे हे जेदा नुकसान उनेंगी दिल्ली च होआ। श्री सचदेवा होंरें दिल्ली थमां जित्ते गेदे सत्ते सांसदे गी मबारकबाद दित्ती। आकाशवाणी कन्नै गल्लबात करदे होई श्री सचदेवा होंरें आखेआ जे लोकसभा चुनां च जित्त औने आहले दिल्ली दे असेंबली चुनाएं दी जित्त दा संकेत ऐ। दक्खन दिल्ली थमां नमें जित्ते दे सांसद रामवीर सिंह विधुरी होंरें आकाशवाणी कन्नै गल्लबात करदे होई आखेआ जे दिल्ली च जित्त पार्टी दी कड़ी मेहनत ते प्रधानमंत्री नरेंद्र मोदी हुंदे कम्मै दी सराहना दा नतीजा ऐ।

<><><><><><>

Maharashtra

भारतीय जनता पार्टी दे वरिष्ठ नेता ते महाराष्ट्र दे उप मुख्मंत्री देवेन्द्र फडणवीस होंरें राज्य च पार्टी दे असंतोषजनक प्रदर्शन दी जिम्मेदारी लैंदे होई उप मुख्मंत्री दे ओहदे थवां इस्तीफे दी पेशकश कीती ऐ। उनें आखेआ जे इस्तीफे मगरा ओह राज्य च औंदे विधानसभा चुनां आस्तै प्रचार करी सकडन। बीजेपी नै 2019 च 23 संसदीय सीटां इत्थुआं जित्तियां। इस बारी 9 सीटां जित्तियां, पार्टी दा वोट फीसद 2019 च 27 अशारिया 8-4 हा जेड़ा इस बारी 26 अशारिया 1-7 फीसद होआ।

<><><><><><>

World Environment Day

प्रधानमंत्री नरेंद्र मोदी होंरें विश्व पर्यावरण दिवस दे मौके पर बुद्धा जयंती पार्क च इक बूहआ लाइयै 'एक पेड़ मां के नाम' अभियान दी शुरूआत कीती। इस अभियान दा मकसद मुख् भरै च करोड़ों-बढ़े रूक्ख बूहटे लाइयै इक अनोखा जन आंदोलन बनाना ऐ। केंद्री पर्यावरण मंत्री भूपेंद्र यादव ते दिल्ली दे

उपराज्यपाल विनय कुमार सक्सेना बी उत्थे मौजूद हे। विश्व पर्यावरण दिवस दे प्रति जागरूकता फैलाने ते पर्यावरण दे मुद्दे पर कम्म करने गी लेइयै मनाया जंदा ऐ। पर्यावरण दी राक्खी-हिफाजत बारै जागरूकता गी लेइयै संयुक्त राष्ट्र दे नेतृत्व च चलाया गेदा एहू कुल संसारी सतह दा इक कार्यक्रम ऐ। इस ध्याड़े दी शुरूआत संयुक्त राष्ट्र महासभा आस्सेआ 1972 च मनुक्खी पर्यावरण पर स्टॉकहोम सम्मेलन दे दरान कीती गेई ही। पैहला विश्व पर्यावरण दिवस 1 बरे परेंत सन् 1973 च मनाया गेआ हा। एहदा मकसद पर्यावरण दे प्रति जागरूकता बधाना ते पर्यावरण सरबंधी मुद्दे पर कुल संसारी सैहयोग गी बढावा देना ऐ। राष्ट्रपति द्रौपदी मुर्मू होरें लोकें कन्नै मिलियै इक बेहतर ते सैलतन आली दुनिया दे निर्माण लेई सांझे तौर पर जन्न करने दा आह्वान कीता। राष्ट्रपति होरें आखेआ जे धरती माता दी रक्षा करना स्हाड़ी बुनियादी जिम्मेदारी ऐ। तोआई उपराष्ट्रपति जगदीप धनखड़ होरें आखेआ जे मनुक्खताउ ते कुदरत दे बश्कार तालमेल गै टिकाऊ जीवन दी बुनियाद ऐ। उनें सब्बनें गी विश्व पर्यावरण दिवस दिआं शुभकामनां दित्तियां न।

<><><><><><>

Kejriwal-Bail

दिल्ली दी इक अदालतै कथित शराब नीति घोटाले च दिल्ली दे मुखमंत्री अरविंद केजरीवाल होरें गी अंतरिम जमानत देने थवां इंकार करी दित्ता ऐ। राउज एवन्यू अदालत दी विशेष न्यायाधीश कावेरी बावेजा होरें उनें चिकित्सीय जांच दे आधार पर 7 दिन दी अंतरिम जमानत दी मंग आली याचिका खारिज करी दित्ती ऐ।

<><><><><><>

DOT-Start Ups

दूर संचार विभाग नै चौथे चरण दे उद्योग परिवर्तन च स्टार्ट अप कन्नै लौहके, भलेयां लौहके ते दरम्याने दर्जे दे उद्यमें दा समर्थन करने आस्तै इक पैहल शुरू कीती ऐ। एहदे च आधार सर्वेक्षण आस्तै प्रस्ताव मंगे गए हे। एह डिजिटल बदलाव गी बढावा देने ते 5-जी ते 6-जी टेकनालोजी आस्तै उद्योगें गी तयार करने दी व्यापक रूप-रेखा होग।

<><><><><><>